



REPUBLIKA E SHQIPËRISË
KUVENDI
Komisioni për Edukimin dhe Mjetet e Informimit Publik

Tiranë, më 16.07. 2019

Dokument Parlamentar

RAPORT
PËR PROJEKTLIGJIN
“PËR AKADEMINË E SHKENCAVE TË REPUBLIKËS SË SHQIPËRISË”

Hyrje

Komisioni për Edukimin dhe Mjetet e Informimit Publik mbështetur në nenet 18,29,34,36 dhe 38 të Rregullores së Kuvendit të Republikës së Shqipërisë, në cilësinë e Komisionit përgjegjës, në mbledhjet e tij në datat 9,10,11,15,16 korrik 2019, mori në shqyrtim projektligjin “Për Akademinë e Shkencave të Republikës së Shqipërisë”.

Relator i projektligjit është deputeti Ismet Beqiraj.

Gjatë diskutimit në parim të projektligjit ishte i pranishëm zoti Redi Shtino, zv.Ministër i Arsimit, Sportit dhe Rinisë.

Gjatë shqyrtimit të projektligjit janë organizuar seanca dëgjimore me aktorë të interesit.

I.BAZA KUSHTETUESE E PROJEKTLIGJIT

Projektligji i paraqitur për shqyrtim është propozuar nga një grup deputetësh, sipas përcaktimeve të nenit 81, pika 1, të Kushtetutës së Republikës së Shqipërisë, nenit 58 të saj, në të cilin liria e kërkimit shkencor mbrohet me ligj, si dhe nenit 59, që përcakton se shteti synon mbrojtjen e trashëgimisë kombëtare, kulturore dhe kujdesin e veçantë për gjuhën shqipe.

Projektligji mbështetet dhe në nenin 55, pika 1, të Rregullores së Kuvendit, i cili kërkon shumicë të thjeshtë votash.

II.VLERËSIMI I SHKALLËS SË PËRAFRIMIT ME ACQUIS COMMUNAUTAIRE
(PËR PROJEKTAKTET NORMATIVE)

Projektligji i propozuar nga Këshilli i Ministrave nuk synon përafrimin me *acquis* të BE-së.

III.QËLLIMI, PËRMBAJTJA DHE RISITË E PROJEKTLIGJIT

2.1. Qëllimi i projektligjit:

Qëllimi i projektligjit të propozuar nga një grup deputetësh është përcaktimi i bazës juridike për organizimin dhe funksionimin e Akademisë së Shkencave të Shqipërisë, për të realizuar reformimin e këtij institucioni kombëtar të rëndësishëm, i cili ndikon në thellimin e reformave të kërimit shkencor në vendin tonë, duke ndërtuar një Akademi të Shkencave sipas modeleve bashkëkohore, mbi bazën e standarteve të ALLEA-s(All European Academies).

Këtij qëllimi i shërbejnë objektivat e projektligjit për ndërtimin dhe funksionimin e Akademisë së Shkencave në përshtatje me nevojat e zhvillimit të vendit, domosdoshmërinë e rritjes së cilësisë, dobisë shoqërore e praktike dhe integritetit të kërimit shkencor.

Mbështetur dhe në përvojën e vendeve të tjera të rajonit dhe kryesisht atyre europiane, si dhe në realitetin shqiptar, qëllimi i projektligjit është të synohet krijimi i një institucioni të hapur, efektiv, bashkëkohor.

2.2. Risitë e projektligjit

Projektligji është hartuar në përgjigje të kërkesave të drejta të Qeverisë së Republikës së Shqipërisë, si dhe komunitetit akademik e shkencor të vendit, për të ndërtuar një Akademi të Shkencave sipas modeleve më të suksesshme bashkëkohore, konform standarteve të ALLEA-s (All European Academies).

Projektligji korrigjon praktikën e gabuara, deri antikushtetuese të konstatuara në aktet e mëparshme, duke garantuar respektim të plotë të parimeve dhe principeve të autonomisë dhe lirive akademike.

Projektligji nuk është një kopjim i një modeli të caktuar, por mbart dhe reflekton përvojat më të mira, si të ligjeve të mëparshme dhe veçanërisht të kuadrit ligjor të akademive simotra, kryesisht ato europiane.

Projektligji përcakton qartë rolin dhe misionin e Akademisë së Shkencave, marrëdhëniet e komunikimit dhe bashkëpunimit të hapur të Akademisë me qendrat kryesore të kërimit, me IAL-të dhe institutet, si dhe organet politikëbërëse për shkencën dhe kërkimin.

Ky projektligj e hap Akademinë e Shkencave ndaj sistemit kërkimor - shkencor në vend, e bën të ndërlidhur me veprimtarinë universitare, qoftë publike, qoftë jopublike.

Projektligji i jep rëndësi parësore njësisë shkencore themelore ku zhvillohet veprimtaria kërkimore, duke përfshirë promovimin e kandidatëve që konkurohen.

Ai siguron përtëritjen e Asamblesë së Akademisë, domosdoshmërisht e nevojshme në kushtet e asamblesë ekzistuese.

Projektligji vendos kritere më rigorozë e të matshme për pranimin e anëtarëve të rinj, si dhe vendos si kufi pranimi për anëtarët e rinj të Akademisë moshën 65 vjeç, duke përfshirë edhe institucionet e arsimit të lartë e të kërimit në përzgjedhjen e kandidatëve.

Projektligji nuk përfshin më kategorinë e akademikut të përhershëm, duke i dhënë akademikëve mbi 75 vjeç statusin *Emeritus*, duke i çliruar ata nga disa detyrime institucionale të pjesëmarrjes në veprimtarinë e Akademisë.

Projektligji, duke u mbështetur në një nga akademitë më të famshme në botë, Akademinë Kombëtare të Shkencave Leopoldina, në Gjermani, përcakton për herë të parë me ligj Akademinë e të Rinjve.

Projektligji u krijon mundësi shkencëtarëve të rinj të marrin pjesë në mënyrë aktive në komisionet dhe në Asamblenë e Akademisë.

Ai bën një hap para drejt respektimit të barazisë gjinore.

Projektligji krijon hapsirat ligjore për ngritjen e qendrave të kërkim - studimit pranë Akademisë së Shkencave, duke i dhënë Akademisë një rol proaktiv dhe jo thjesht deklarativ, për kryerjen e misionit të saj.

Një aspekt i rëndësishëm i projektligjit është se ai krijon hapësirat e duhura të hapjes ndaj diasporës shkencore dhe ndaj akademikëve dhe mendimit akademik shqiptar në rajon, çka mundëson që Akademia të luajë një rol primar në zhvillimin e shkencave të albanologjisë dhe të identitetit kombëtar, si dhe të ndikojë në përfshirjen aktive të studjuesve më të suksesshëm jashtë vendit, në kryerjen së bashku me ta të misionit dhe qëllimit që ka Akademia e Shkencave.

Një tjetër gjë shumë e rëndësishme është ndarja e drejtimit administrativ nga drejtimi shkencor, rritja e rolit të Asamblesë që bëhet autoriteti më i rëndësishëm vendimmarrës në këtë institucion, delegimi i të drejtave nga kryesia te seksionet që tashmë marrin një rol krejt të ri dhe në përgjithësi demokratizimi dhe hapja e institucionit.

IV.KONSULTIMI PUBLIK I PROJEKTLIGJIT

Për të finalizuar një përmirësim sa më të arrirë të projektligjit, Komisioni organizoi seancë dëgjimore me aktorë të interesit: akademikë nga Asambleja e Akademisë së Shkencave, Akademia e Studimeve Albanologjike, rektorë të universiteteve publike. Në këto seanca ishte i pranishëm zoti Redi Shtino, zv.ministër i Arsimit.

Këtij qëllimi i shërbeu seanca dëgjimore me akademikët:

- Vasil Tole, Shaban Sinani, Neki Frashëri, Emin Riza, Ilirian Malollari, Mereglen Verli;
- Seancë e veçantë me mendim oponent, me akademik Artan Fuga.

Seancë dëgjimore me rektorët e universiteteve publike, profesorët:

- Agron Cuko – rektor i Univeritetit të Sportit, Tiranë,
- Adem Bekteshi – rektor i Univeritetit “Luigj Gurakuqi”, Shkodër,
- Skënder Topi – rektor i Universitetit “Aleksandër Xhuvani”, Elbasan,
- Sulejman Sulçe – zv.rektor i Universitetit Bujqësor, Tiranë,
- Lekë Sokoli – zv.rektor i Universitetit “Aleksandër Mojsiu”, Durrës,
- Valbona Duri – zv.rektore e Universitetit “Eqerem Çabej”, Gjirokastër,
- Sokol Banaj - zv.rektor i Universitetit “Ismail Qemali”, Vlorë.

Një seancë dëgjimore për këtë projektligj u zhvillua dhe me znj. Besa Shahini, Ministre e Arsimit, Sportit dhe Rinisë.

Në seancën dëgjimore me akademikë, anëtarë të Asamblesë së Akademisë së Shkencave, projektligji u vlerësua për përmbajtjen e tij, domosdoshmërinë e hartimit dhe miratimit, pasi siç theksuan akademikët sjell një sërë risish, ndër të cilat në mënyrë të sintetizuar mund të përmendim:

-Projektligji është konform standardeve europiane për organizimin dhe mirëfeksionimin e akademive të shkencave;

- hartimi i projektligjit është bërë përmes një procesi të gjatë dyvjeçar konsultimesh, reflektimesh të përvojave më të mira të akademive simotra rajonale dhe sidomos atyre europiane, ku një vend të veçantë zënë ato me ALLE-an dhe Akademinë Leopoldina në Gjermani etj.;

- çon në respektimin e plotë të parimeve dhe principeve të autonomisë dhe lirive akademike;

- korrigjon praktikat e gabuara deri antikushtetuese;

- çon në hapjen ndaj komuniteteve të arsimit të lartë dhe kërkimit shkencor;

- fleksibilitet në marrëdhëniet me universitetet, institucionet kërkimore - shkencore, hapja ndaj tyre;

- i jep rëndësi parësore njësisë shkencore themelore ku zhvillohet veprimtaria kërkimore, duke përfshirë promovimin e kandidaturave që konkurohen;

- përcakton qartë kompetencat, funksionet dhe procedurat vendimmarrëse, përcakton kritere rigoroze për anëtarësimet e reja;

- krijon kushte ligjore për pjesëmarrjen e shkencëtarëve të rinj në komisione dhe Asamblenë e Akademisë;

- krijon kushte për rifreskimin e Asamblesë së Akademisë;

- përmirësime që synon në respektimin gjinor;

- mbi 15 pranime të akademikëve të rinj gjatë dy viteve të ardhshme;

- krijimin e Akademisë së të Rinjve për herë të parë;

- krijimin e kushteve për rifreskimin e Asamblesë së Akademisë;

- krijimin e hapësirave ligjore për ngritjen e qendrave të kërkim - studimit pranë Akademisë së Shkencave;

- përcaktim i qartë i kompetencave, funksioneve dhe procedurave vendimmarrëse, përcaktim i kritereve rigoroze për pranimet e reja;

- projektligji nuk përfshin më kategorinë e akademikut të përhershëm, duke i dhënë akademikëve mbi 75 vjeç statusin *Emeritus*, duke i çliruar ata nga disa detyrime institucionale të pjesëmarrjes në veprimtarinë e Akademisë;

- hapjen ndaj diasporës shkencore dhe mendimit akademik shqiptar në rajon, çfarë mundëson që Akademia të luajë një rol primar në zhvillimin e shkencave së albanologjisë;

44 antarë të Asamblesë, nga 45, gjithsejt janë shprehur pro këtij projektligji etj..

Në seancën dëgjimore me Akademikun Artan Fuga, nga ana e tij projektligji u kritikua.

Akademiku Fuga kërkoi që projektligji të kthehet, të merret në konsideratë platforma e tij, që sipas tij jep mundësi për rithemelimin. Ndër të tjera vuri në dukje se: “Ky projektligj është shkruar me plot pasaktësira, kontradikta brenda vetes, duke mos bërë përcaktime juridike dhe institucionale të sakta; nuk kuptohet se çfarë roli luajnë seksionet; nuk përcaktohet roli i komisioneve të posaçme edhe të përhershme; akademia ka një aparat të fryrë; nuk ka shpjegime dhe norma se si zgjidhet kryetari, nënkryetarët; roli i kancelarit; nuk kuptohet se çfarë funksioni duhet të ketë Akademia e të Rinjve; kundërshtitë që ka projektligji me autonominë e universiteteve sipas ligjit “Për arësimin e lartë dhe kërkimin shkencor në RSH”, si edhe të institucioneve kërkimore shkencore; nuk ka relacion financiar etj..”

Akademiku Artan Fuga dorëzoi pranë Komisionit edhe një variant të projektligjit të hartuar dhe shkruar nga ana e tij.

Në seancën dëgjimore me rektorët e universiteteve publike.

Rektorët dhe zv.rektorët e universiteteve publike të pranishëm në seancë dëgjimore, dhanë mendimet e tyre, në thelb të cilave ishte domosdoshmëria e miratimit të një ligji për Akademinë e Shkencave, që nuk bie ndesh me ligjin “Për arësimin e lartë dhe kërkimin shkencor në RSH”.

Në diskutimet e tyre kishte vlerësime pozitive për projektligjin, siç u shprehën Rektori i Universitetit të Sporteve, zv.rektorët e Universiteteve Bujqësor të Tiranës, të Vlorës, Gjorokastrës, disa prej tyre, shoqëruar dhe me propozime konkrete, ku ata evidentuan faktin se janë universitetet që përgatisin akademikët e ardhshëm.

Sipas rektorit të Universitetit të Elbasanit dhe të disa pjesëmarrësve të tjerë, në lidhje me monitorimin e procesit kërkimor që kërkohet të realizohet nga Akademia e Shkencave, ky monitorim është në shkelje të ligjit të arsimit të lartë, pasi ky i fundit bashkë me aktet nënligjore të dala në emër e për llogari të tij, rregullon të gjithë procesin akademik të kërkimit shkencor. Ai “është pjesë e lirisë akademike dhe autonomisë të arsimit të lartë: a) për të organizuar veprimtaritë e mësimdhënies, ato kërkimore-shkencore, të inovacionit si dhe veprimtaritë krijuese; b) për të hartuar dhe zhvilluar programet e studimit dhe për të përcaktuar fushat e veprimtarisë kërkimore-shkencore”.

Gjithashtu, nëpërmjet këtij ligji është krijuar një sistem i unifikuar i arsimit të lartë, kërkimit shkencor në institucionet e arsimit të lartë, inovacionit bashkëkohor e konkurrues në

hapësirën evropiane të arsimit të lartë, duke kërkuar nga shteti, organet e tij dhe strukturat përgjegjëse, garantimin e autonomisë dhe lirisë akademike.

Njëkohësisht ato kundërshtuan pjesëmarrjen e akademikëve në senatet universitare, kërkimin e informacionit për punën shkencore etj., pasi bie ndesh me ligjin e arsimit të lartë

V.EFEKTET FINANCIARE TË PROJEKTLIGJIT

Komisioni, në lidhje me efektet financiare të projektligjit, mbështetur në nenin 82, pika 2 të Kushtetutës dhe nenit 68, pika 3 të Rregullores së Kuvendit, ku përcaktohet qartë se “ Asnjë projektligj joqeveritar që bën të nevojshme rritjen e shpenzimeve të Buxhetit të Shtetit ose që pakëson të ardhurat, nuk mund të miratohet pa marrë mendimin e Këshillit të Ministrave.....” iu drejtua Këshillit të Ministrave. Pas përgjigjes së tij, Komisioni propozon për miratim nenin 23 të formuluar si më poshtë:

Neni 23 Financimi

1. Akademia është institucion buxhetor.
2. Veprimtaria e saj financohet nga:
 - a. Buxheti i Shtetit;
 - b. shërbimet tekniko-shkencore që kryhen për persona juridikë e fizikë jashtë sistemit të saj;
 - c. aplikimet, projektet, dhuratat, subvencionet e sponsorizimet, të cilat përdoren në përputhje me aktet ligjore e nënligjore në fuqi.
3. Të ardhurat nga pikat “b” e “c” nuk zvogëlojnë buxhetin e përgjithshëm sipas pikës “a” dhe ato përdoren sipas rregullores së brendshme përkatëse të Akademisë.
4. Projektbuxheti i radhës i dërgohet për miratim Kuvendit.

VI. DISKUTIMI NË KOMISION

Gjatë diskutimit në parim të projektligjit, fillimisht deputetja Eglantina Gjermeni në emër të grupit nismëtar paraqiti vlerat e projektligjit, domosdoshmërinë e miratimit tij, konsultimet e realizura me akademikë, personalitete të fushave të ndryshme, si dhe studjues të njohur të akademive evropiane, një nga të cilët, nga Akademia Leopoldina, ishte i pranishëm në këtë seancë. Diskutimi saj u mbështet dhe nga deputet e tjerë nismëtar të këtij projektligji.

Gjerësisht rreth projektligjit u ndal si në diskutimin në parim, ashtu dhe në diskutimin nën për nenin deputeti Ismet Beqiraj, relator i projektligjit “ Për Akademinë e Shkencave të Republikës së Shqipërisë”, propozim i një grupi deputetësh.

Relatori vuri në dukje tërë procesin e hartimit e draftimit të projektligjit. Theksoi dëgjesat e realizuara në Komision, punën që ka bërë në vjeljen e mendimeve dhe propozimeve të botës akademike, institucioneve dhe figurave të shquara të shkencës e kulturës.

Në diskutimet e relatorit, deputetit Ismet Beqiraj, zv.kryetares së Komisionit, Milva Ekonomi, dhe deputetëve të tjerë të mazhorancës, që në fillim u theksua se projektligji është hartuar në përgjigje të kërkesave të drejta të Qeverisë së Republikës së Shqipërisë, si dhe të

komunitetit akademik e shkencor të vendit, për të ndërtuar një Akademi të Shkencave sipas modeleve më të suksesshme bashkëkohore, konform standardeve të ALLEA-s (All European Academies).

Deputetët e mazhorancës u ndalën në përmirësimet e ndjeshme që sjell projektligji, në krahasim me ligjin nr.9655, datë 11.12.2006, “Për Akademinë e Shkencave të Republikës së Shqipërisë”, të ndryshuar”.

Përmes këtij projektligji ripërcaktohet qartë roli këshillimor, promovues, rekomandues, bashkëpunues, nxitës, demokratizues i këtij institucioni me rëndësi kombëtare për vendin.

Ky projektligj krijon mundësi të hapjes së Akademisë Shkencave ndaj universiteteve, institucioneve të arsimit të lartë e kërkimit shkencor(IAL), ndaj institucioneve kërkimore-shkencore. Kjo reflektohet qartë, theksuan deputetët, në ndërtimin e komisioneve, si njësi permanente të Akademisë, në kuadrin e seksioneve dhe të përbëra, përveç se nga anëtarët e Akademisë, edhe nga profesorët dhe ekspertët me arritje të spikatur në fushat e tyre.

Deputetët për këtë projektligj vlerësuan kriteret ligjore për ripërtëritjen e Asamblesë së Akademisë së Shkencave dhe përbërjes së Akademisë, me përfaqësues nga më të shquarit e komuniteteve shkencore të vendit, përmes harmonizimit të brezave, moshave e disiplinave në fushën kërkimore shkencore.

Në diskutimin e relatorit për projektligjin dhe të deputetëve të Komisionit me theks të veçantë u trajtuan ndryshimet e rëndësishme në legjislacionin për të rinjtë, në vendosjen e standardeve dhe kriterëve rigoroze për pranimin e tyre, mbështetjen e atyre që manifestojnë cilësi në kërkimin shkencor dhe shquhen në veprimtarinë e tyre kërkimore – shkencore, si dhe përfaqësojnë denjësisht vendin dhe në arenën ndërkombëtare.

Ky synim për një përtëritje dinamike në vazhdimësi të këtij institucioni, në projektligj reflektohet dhe përmes parashikimit për funksionimin e Akademisë së të Rinjve, si organ këshillues e bashkëpunues pranë Akademisë së Shkencave, duke inkurajuar drejtpërsëdrejti veprimtarinë kërkimore - shkencore të kërkuesve të rinj.

Deputetët e mazhorancës në diskutimet e tyre u ndalën dhe në dispozitat ligjore për garantimin e integritetit të kërkimit shkencor, jo vetëm në veprimtarinë e Akademisë së Shkencave dhe anëtarëve të saj, por në gjithë sistemin e kërkimit shkencor të institucioneve të arsimit të lartë dhe institucioneve të tjera kërkimore - shkencore në vend.

Një vend të veçantë në diskutimet e tyre ishte bashkëpunimi me akademitë shqiptare në rajon, si dhe me figurat e shquara të personaliteteve shkencore shqiptare në diasporë etj..

Deputetët gjatë shqyrtimit nen për nen bënë propozimet e tyre konkrete për përmirësimin e projektligjit.

Njëkohësisht, gjatë diskutimit nen për nen, krahas paraqitjes së propozimeve të akademikëve, rektorëve të universiteteve dhe kolegëve deputetë, relatori bëri dhe propozimet e tij konkrete rreth neneve përkatëse të projektligjit.

Rreth projektligjit është shprehur kundër znj. Fatjona Dhimitri, kryetare e Komisionit, e cila gjatë seancës së diskutimit nen për nen u largua në shenjë proteste kundër miratimit të tij, duke theksuar se: "nuk janë marrë parasysh mendimet e disa rektorëve dhe zotit Fuga" .

Në Komision u shpreh për proejktligjin dhe deputeti i opozitës Kostaq Papa, që kërkoi miratimin e një ligji cilësor për një institucion kaq të rëndësishëm shkencor të vendit.

V.PËRFUNDIM

Në përfundim, Komisioni për Edukimin dhe Mjetet e Informimit Publik, duke vlerësuar projektligjin në tërë komponentët e tij, me shumicën e votave të të gjithë deputetëve, miratoi në parim, nen për nen dhe në tërësi projektligjin dhe i paraqet seancës plenare miratimin e tij sipas tekstit integral bashkëlidhur këtij raporti.

RELATORI

Ismet BEQIRAJ

ZV/KRYETARE

Milva EKONOMI



**REPUBLIKA E SHQIPËRISË
KUVENDI**

LIGJ

Nr. __, datë _____

PËR AKADEMINË E SHKENCAVE TË REPUBLIKËS SË SHQIPËRISË

Në mbështetje të neneve 78 dhe 83 pika 1 të Kushtetutës, me propozim të Këshillit të Ministrave,

KUVENDI I REPUBLIKËS SË SHQIPËRISË

VENDOSI:

**KREU I
DISPOZITA TË PËRGJITHSHME**

**Neni 1
Qëllimi**

Qëllimi i këtij ligji është përcaktimi i kuadrit ligjor për organizimin dhe funksionimin e Akademisë së Shkencave të Republikës së Shqipërisë, në vijim Akademia.

**Neni 2
Objekti**

Objekti këtij ligji është përcaktimi i rolit të Akademisë së Shkencave, i organeve të saj përbërëse dhe i atyre që veprojnë pranë saj, si dhe rregullimi i marrëdhënieve të Akademisë me institucionet e tjera të kërkimit shkencor e të politikave të zhvillimit të tij.

**Neni 3
Akademia**

1. Akademia është institucioni publik më i lartë që përfaqëson e mbart vlerat më të mira të shkencës, të kërkimit shkencor, të krijimtarisë dhe të debatit e bashkëveprimit të mendimit shkencor në vend, përmes një bashkësie të zgjedhur shkencëtarësh e krijuesish.

2. Akademia është institucion autonom në fushën e kërkimit, që e mbështet veprimtarinë e saj në prova shkencore dhe në dobi të vendit.
3. Akademia, si person juridik, përbëhet nga trupa e shkencëtarëve dhe e kërkuesve, që në këtë ligj do të quhet Asamble.
4. Selia e Akademisë është në Tiranë. Ajo ka logon dhe simbolet e saj zyrtare.

Neni 4

Roli dhe funksionet kryesore të Akademisë

1. Të pranojë si anëtarë në radhët e saj dijetarë, krijues e kërkues të shquar në fushën e shkencës dhe të kulturës, të cilët përmbushin standarde të larta në lidhje me personalitetin, punën dhe reputacionin në shkencë e kulturë.
2. Të kontribuojë e të promovojë arritjet e kërkimit shkencor dhe të propozojë fusha të reja kërkimore e studimore në përputhje me përparësitë e nevojat e zhvillimit të vendit.
3. Të ndërtojë strategji dhe zbatojë politika për përdorimin e njësuar të gjuhës shqipe zyrtare, të terminologjive bashkëkohore të shkencës dhe teknikës, si dhe për konsolidimin e gjuhës shqipe në të gjitha fushat e shkencës.
4. Të këshillojë e të ndihmojë me rekomandime, ekspertiza e opinionet qeverinë dhe institucionet qendrore për aspekte të rëndësishme të kërkimit shkencor, të formimit të specialistëve të lartë dhe të planifikimit të projekteve të së ardhmes.
5. Të kontribuojë në promovimin dhe mbështetjen e vazhdueshme të shkencëtarëve të rinj.
6. Të nxisë dhe udhëheqë krijimin e njësive të veçanta të kërkimit, si dhe të hartimit të strategjive të zhvillimit të shkencës e të kërkimit shkencor.
7. Të promovojë, botojë dhe shpërndajë, standardet e reja ndërkombëtare të kërkimit shkencor dhe të inovacionit, si dhe të garantojë respektimin e tyre për vlerësimin e punës shkencore dhe etikës në shkencë, si dhe për mbështetjen e programeve të studimit a kërkimit.
8. Të botojë organe periodike dhe vepra të tjera me nivel të lartë ndikimi shkencor.
9. Të bashkëpunojë me institucionet e vendit me kapacitet kërkimi, si institucionet e arsimit të lartë, institutet dhe qendrat e kërkimit, me qëllim koordinimin e kërkimit shkencor dhe përgatitjen e kërkuesve të rinj.
10. Të bashkëpunojë me institucionet analoge jashtë vendit për promovimin e arritjeve dhe për tërheqjen e projekteve të përbashkëta, për diplomacinë shkencore dhe për të përfaqësuar në shkallë ndërkombëtare komunitetin shkencor shqiptar.
11. Të organizojë kongrese, konferenca e simpoziume shkencore në shkallë kombëtare e ndërkombëtare. Të mbështesë metodologjitë bashkëkohore për shkencat shoqërore që kanë për objekt historinë kombëtare, identitetin shqiptar dhe njësinë e gjuhës shqipe.
12. Të ruajë, të dokumentojë dhe të përcjellë trashëgiminë akademike, përmes botimeve përmbledhëse të veprave të figurave më të spikatura, zhvillimit të aktiviteteve, ekspozitave dhe muzeve të ngritura në përputhje me legjislacionin përkatës.

13. Të propozojë metoda e kritere për matjen dhe vlerësimin objektiv të cilësisë dhe kontributeve në procesin e kërkimit shkencor, pranë ministrisë përkatëse, komisionit të Kuvendit a Këshillit të Ministrave.
14. Të orientojë fushat dhe nënfushat prioritare, në bashkëpunim me Ministrinë përgjegjëse për shkencën, për kërkimet shkencore të doktoratës. Të analizojë arritjet dhe problematikat e këtyre kërkimeve dhe të hartojë në çdo dy vjet një raport publik për to.
15. Të inkurajojë si prioritet të kërkimit shkencor zhvillimin e programeve të studimit me karakter ndërdisiplinor dhe të mbrojë deontologjinë e tij.
16. Të promovojë identitetin kombëtar nëpërmjet përafrimit gjithmonë e më të ngushtë me akademitë shqiptare në rajon.
17. Të ndërtojë strategji dhe zbatojë politika për zhvillimin e shkencave të Albanologjisë dhe për promovimin e arritjeve të tyre, brenda dhe jashtë vendit.
18. Të ndërtojë strategji dhe zbatojë politika për përdorimin e njehesuar të gjuhës shqipe në funksionet zyrtare
 19. T'u garantojë që zgjedhjet e anëtarëve të Asamblesë të zhvillohen në përputhje me parimin e barazisë gjinore, duke synuar progresivisht balancën gjinore të përfaqësimit.

Neni 5 Përbërja e Akademisë

1. Akademia si institucion përfshin organet e saj drejtuese:
 - a) Asambleja;
 - b) Kryesia;
 - c) Kryetari.
2. Akademia përfshin edhe disa struktura të ngritura në përbërje ose pranë saj, si:
 - a) Seksione;
 - b) Komisione;
 - c) Njësi të kërkim-studimit;
 - d) Akademia e të Rinjve;
 - e) Biblioteka;
 - f) Enti botues;
 - g) Administrata ndihmëse

KREU II PËRBËRJA E DETYRAT E ASAMBLESË

Neni 6 Asambleja

1. Asambleja është trupa e shkencëtarëve dhe e kërkuesve, dhe përbëhet nga akademikët dhe akademikët e asociuar, që do të quhen anëtarë të Asamblesë. Numri i akademikëve është deri në 30, ndërsa numri i akademikëve të asociuar është deri në 10.

2. Anëtarët zgjidhen nga Asambleja ndër mbajtësit e titullit "Profesor", që kanë një kontribut të veçantë me një ndikim të gjithëpranuar në fushën përkatëse, në bazë të kandidaturave të përzgjedhura nëpërmjet procedurave e kriterëve të përcaktuara në statutin e Akademisë. Në procedurat e kandidimit e të përzgjedhjes përfshihen edhe struktura a përfaqësues të institucioneve të kërkimit shkencor, të arsimit të lartë e të kulturës. Në raste të veçanta, anëtarë zgjidhen personalitete me kontribut të spikatur nga fusha e krijimtarisë artistike, kulturës dhe jetës sociale në përgjithësi. Si rregull, akademikët zgjidhen nga radhët e akademikëve të asociuar. Në rast kandidimi të drejtpërdrejtë kandidati duhet të marrë mbështetjen e jo më pak se 2/3 të numrit të përgjithshëm të anëtarëve të Asamblesë.
3. Asambleja zgjedh edhe anëtarë të jashtëm ndër personat me shtetësi apo origjinë shqiptare me banim jashtë vendit, figura të shkencës e të kulturës, si dhe anëtarë nderi ndër figurat e shkencës e të kulturës që janë shtetas joshqiptarë me banim jashtë vendit, të cilët me punimet e tyre kanë ndikuar në ecurinë e mendimit e të zbatimit të shkencës në Shqipëri apo në promovimin e të vërtetave dhe të vlerave të origjinës, gjuhës e kulturës shqiptare. Numri i anëtarëve të nderit është deri në 15, i anëtarëve të jashtëm deri në 10 dhe i anëtarëve korrespondente deri në 15. Personat me origjinë shqiptare që janë anëtarë me të drejta të plota të një akademie pjesëtare të "All European Academies", fitojnë drejtpërdrejt statusin e anëtarit të jashtëm të Akademisë së Shkencave, e cila formalizohet nga një mbledhje ceremoniale e Asamblesë. Këta të fundit nuk përfshihen në llogaritjen e kufirit maksimal të sipërcituar.
4. Anëtarët e Asamblesë që mbushin moshën 75 vjeç, marrin statusin e anëtarit "Emeritus". Ata nuk përfshihen në llogaritjen e kufizimeve të pikës 1 të këtij neni.
5. Personat e zgjedhur sipas këtij neni, quhen "Anëtarë të Asamblesë".

Neni 7

Detyrat e Asamblesë

Asambleja kryen këto detyra:

1. Zgjedh anëtarët e Akademisë.
2. Zgjedh kryetarin, nënkryetarin, sekretarin shkencor, drejtuesit e seksioneve.
3. Miraton projektbuxhetin vjetor , pas përgatitjes së tij nga Kryesia, dhe ia dërgon Kuvendit për miratim.
4. Miraton raportin vjetor të veprimtarisë së Akademisë për vitin përmbys, pas përgatitjes së tij nga Kryesia.
5. Miraton programin e punës për vitin pasardhës, si edhe programet afatgjata e strategjitë e zhvillimit.
6. Miraton Statutin dhe ndryshimet e tij me 2/3 e votave.
7. Miraton marrëveshjet që nënshkruan Akademia me të tretët, sipas përcaktimeve në Statut.
8. Përcakton llojet e cmimeve shkencore dhe kriteret e dhenies së tyre.

9. Miraton aderimin e Akademisë në organizata a bashkime ndërkombëtare të natyrës shkencore.
10. Asambleja kryen edhe çdo detyrë tjetër të ngarkuar nga Statuti.

Neni 8 **Mbledhjet e Asamblesë**

1. Asambleja mbledhet si rregull dy herë në vit.
2. Zgjedhjet për anëtarët e rinj të Kryesisë zhvillohen gjithnjë në fund të vitit, përveç rasteve të mbetjes së vendeve të lira në organet drejtuese, sipas përcaktimeve në Statut.
3. Asambleja çdo vit zhvillon një mbledhje të zgjeruar të saj për miratimin e projektbuxhetit, programit dhe raportit vjetor të saj.
4. Mbledhjet e Asamblese janë të vlefshme kur në to merr pjesë më shumë se gjysma e të gjithë anëtarëve të saj.
5. Vendimi me shumicë të thjeshtë merret kur për të voton pro më shumë se gjysma e antëtareve të pranishëm.
6. Zgjedhjet për personat që ushtrojnë kompetencat e parashikuara në pikat 1 dhe 2 të nenit 7 të këtij ligji, bëhen me votim të fshehtë dhe me shumicë absolute të të gjithë anëtarëve.
7. Mospjesëmarrja e anëtarëve emeritus nuk cenon arritjen e kuorumit apo në përcaktimin e shumicave të cilësuar.

Neni 9 **Të drejtat dhe detyrat e anëtarëve të Asamblesë**

Anëtarët e Asamblese kanë keto të drejta dhe detyra:

1. Të zgjedhin dhe të zgjidhen në organet drejtuese dhe në strukturat në përbërje ose pranë Akademisë.
2. Të marrin pjesë aktive në mbledhjet e Asamblesë, të seksioneve dhe të komisioneve.
3. Të luajnë rol aktiv në stimulimin dhe promovimin e shkencës e të kërkimit shkencor në institucionet ku punojnë apo në fushën përkatëse.
4. Të zbatojnë detyrat që u janë dhënë nga Asambleja, Kryesia, Kryetari, kryetarët e seksioneve apo komisioni përkatës.
5. Të marrin pjesë aktive në kongreset, konferencat e veprimtaritë zyrtare të Akademisë dhe të organeve të saj.
6. Të kërkojnë dhe të marrin informacion për punën shkencore, planet dhe programet e përgatitura nga institucionet e arsimit të lartë dhe nga institucionet kërkimore për fushën që mbulojnë.
7. Të japin ekspertizë dhe këshillime për institucionet publike të shkencës dhe të arsimit.
8. Të marrin pjesë në njësitë apo grupet e punës për studimin, hartimin dhe kërkimin në fusha të caktuara.
9. Të përfaqësojnë Akademinë e Shkencave në komisione, borde dhe këshilla ekspertize me karakter ndërinstitucional.

10. Anëtarët emeritus përjashtohen nga detyrimet e pikës së dytë të këtij neni dhe nga e drejta për t'u zgjedhur në organet drejtuese.

Neni 10

Të drejtat dhe detyrat e anëtarëve të tjerë

Anëtarët e jashtëm, të nderit dhe ata korrespondentë kanë të drejtë të marrin pjesë në mbledhjet e Asamblesë dhe në të gjithë aktivitetet e Akademisë. Me pëlqimin e tyre, ata aktivizohen dhe kontribuojnë në plotësimin e detyrave të Akademisë dhe të anëtarëve të saj të parashikuara në nenet 4 dhe 9 të këtij ligji.

Neni 11

Zgjedhja e Kryesisë

1. Kryesia është organ ekzekutiv i Akademisë.
2. Kryesia përbëhet nga kryetari, zëvendëskryetari, sekretari shkencor dhe drejtuesit e seksioneve.
3. Asambleja zgjedh me votim të fshehtë për një mandat katërvjeçar kryetarin e Akademisë.
4. Kryetari i Akademisë duhet të jetë anëtar i rregullt dhe i përhershëm.
Zgjedhja e tij bëhet nga anëtarët e Asamblese drejtpërdrejt dhe me votim të fshehtë. Kryetar i Akademisë zgjidhet akademiku që fiton shumicën absolute të votave të anëtarëve të Asamblese. Në rast se asnjë kandidat nuk fiton shumicën absolute të votave, votimi përsëritet dhe kandidati që fiton më shumë se gjysmën e votave të antëtarëve të pranishëm zgjidhet Kryetar i Akademisë.
5. Presidenti Republikës brenda 10 (dhjete) diteve nga data e marjes dijeni për vendimin e asamblese së Akademisë, emeron kryetarin e zgjedhur prej saj.
6. Kur Presidenti i Republikës vendos mosemerimin e kryetarit të zgjedhur, dekreti i Presidentit e humbet fuqinë nëse nuk mbështetet nga shumica e të gjithë antareve të Asamblese.
7. Në rastin e parashikuar në pikën 6 të këtij neni, si dhe kur Presidenti nuk shprehet, kryetari i zgjedhur shpallet i emeruar dhe fillon detyrën brenda 7 diteve nga data e marjes së vendimit të Asamblese ose nga data e mbarimit të afatit të parashikuar në pikën 5 të këtij neni.
8. Zëvendëskryetari, sekretari shkencor dhe drejtuesit e seksioneve zgjidhen drejtpërdrejt me votim të fshehtë, me shumicën absolute të votave, nga radhët e anëtarëve të rregullt, të përhershëm dhe të asociuar.
9. Mandati i zëvendëskryetarit është 4 vjet, ndërsa ai sekretarit shkencor dhe drejtuesve të seksioneve është 5 vjet.
10. Kryetari, zëvendëskryetari, sekretari shkencor dhe drejtuesit e seksioneve mund të rizgjidhen në të njëjtin funksion për dy mandate, por jo radhazi.
11. Kriteret dhe procedura e zgjedhjes së kryesisë përcaktohet në statutin e Akademise.

Neni 12

Detyrat dhe kompetencat e Kryesisë

1. Detyrat dhe kompetencat e Kryesisë janë:
 - a) organizon dhe drejton Akademinë në bazë e në zbatim të këtij ligji, statutit të saj dhe vendimeve të Asamblesë;
 - b) ndjek dhe organizon punën e seksioneve, komisioneve, si dhe të njësive të ngritura pranë Akademisë;
 - c) organizon dhe drejton punën e administratës së Akademisë, përfshirë edhe entin botues, sipas rregullores së brendshme të funksionimit të saj;
 - d) përgatit projektprogramin dhe projektbuxhetin;
 - e) përgatit mbledhjet e Asamblesë;
 - f) përgatit raportin vjetor.
2. Për kryerjen e detyrave të saj Kryesia nxjerr vendime të brendshme. Vendimet e brendshme merren me shumicë të thjeshtë. Në rast barazimi, vota e Kryetarit është përcaktuese.
3. Detyrat e zëvendëskryetarit, sekretarit shkencor dhe drejtuesve të seksioneve përcaktohen në statutin e akademise.

Neni 13

Kryetari

1. Detyrat e kryetarit janë:
 - a) drejton e organizon punën e veprimtarinë e Akademisë e të Kryesisë;
 - b) përfaqëson Akademinë në marrëdhënie me të tretët dhe nënshkruan në emër të saj;
 - c) raporton në Asamble për aktivitetin e përgjithshëm;
 - d) raporton në Kryesi për aktivitetin semestral;
 - e) drejton mbledhjet e Asamblesë;
 - f) nënshkruan vendimet e Kryesisë dhe të Asamblesë;
 - g) zbaton detyrat e përcaktuara në Statut.
2. Në zbatimin e detyrave dhe kompetencave të tij, Kryetari nxjerr urdhëra të brendshëm.

KREU IV

VLEFSHMËRIA, PAPAJTUESHMËRITË DHE NDËRPRERJA E MANDATEVE

Neni 14

Vlefshmëria

1. Me zgjedhjen si anëtar i Asamblesë, personi fiton titullin "akademik" ose "akademik i asociuar".
2. Titujt "akademik" dhe "akademik i asociuar" janë tituj akademikë, e si të tillë hiqen vetëm në rastet e ndërprerjes së mandateve të parashikuara në këtë ligj, apo me vendim gjykate.

3. Kur një anëtar i Asamblesë shkon me banim të përhershëm jashtë vendit, atëherë ai kalon në statusin "anëtar i jashtëm". Në rast rikthimi, rifiton statusin e mëparshëm.

Neni 15

Ndalesat dhe papajtueshmëria

1. Anëtarë të Asamblesë mund të zgjidhen personat deri në moshën 68 vjeç për titullin "akademik" dhe 65 vjeç për titullin "akademik i asociuar".
2. Personat që ushtrojnë funksione drejtuese në institucionet kushtetuese apo në partitë politike, nuk mund të zgjidhen anëtarë të Asamblesë.
3. Personat që ushtrojnë detyra të larta drejtuese shtetërore ose në partitë politike, sipas përcaktimeve në Statut, nuk mund të zgjidhen anëtarë të Kryesisë.
4. Anëtarët e Kryesisë nuk mund të ushtrojnë funksion tjetër me kohë të plotë.

Neni 16

Ndërprerja e mandateve

1. Mandati i anëtarit të Akademisë ndërpritet për një nga shkaqet e mëposhtme:
 - a) Jep dorëheqjen;
 - b) Për komprometim të rëndë të figurës së akademikut, për shkelje të parimeve të deontologjisë ose për shkaqe të parashikuara në ligj.
 - c) Për pamundësi për ushtrimin e funksionit;
2. Mandati i anëtarit të kryesisë ndërpritet për një nga shkaqet e mëposhtme:
 - a) Jep dorëheqjen,
 - b) Pranon të zgjidhet ose emërohet në një funksion të papajtueshëm të parashikuar në nenin 15, pikat 3,4.
 - c) Mbush moshën 75 vjeç,
 - ç) Shkarkohet nga Asambleja me 2/3 e votave, për shkelje të rënda në ushtrimin e detyrës.
3. Në rastet e tjera Kryetari zëvendësohet përkohësisht nga nënkryetari, ndërsa anëtarët e tjerë nga një person i caktuar nga Kryesia.

KREU V

STRUKTURAT E NJËSITË NDIHMËSE

Neni 17

Seksionet

1. Me qëllim organizimin e punës dhe realizimin e funksioneve të saj, anëtarët e Asamblesë organizohen në seksione, sipas grupfushave kryesore.
2. Asambleja përcakton numrin e seksioneve që do të funksionojnë pranë Akademisë.
3. Detyrat, përgjegjësitë, përbërja, mënyra e drejtimit dhe e funksionimit të tyre përcaktohen në statutin e Akademisë .

4. Seksionet mblidhen jo më pak se 4 herë në vit.

Neni 18

Komisionet

1. Pranë Akademisë ngrihen komisione të përhershme ose komisione të posaçme.
2. Në përbërje të komisioneve ka si anëtarë, përveç akademikëve edhe përfaqësues të institucioneve dhe qendrave të kërkimit shkencor dhe të arsimit të lartë.
3. Komisionet e përhershme ngrihen sipas fushave.
4. Numri, emërtimi, lloji, objekti dhe detyrat e tyre caktohen në Statutin e Akademisë.
5. Komisionet e posaçme ngrihen me vendim të Kryesisë, sipas përcaktimeve në Statut.

Neni 19

Njësitë e kërkim-studimit

1. Sipas nevojave, detyrave e problemeve në fushën e kërkimit, në përmbushje të rolit të saj, pranë Akademisë mund të ngrihen njësi të kërkim-studimit me aktivitet afatshkurtër e afatgjatë.
2. Këto njësi janë autonome në realizimin e detyrave të tyre, mbajnë marrëdhënie me Kryesinë e Kryetarin dhe raportojnë pranë tyre.
3. Sipas rëndësisë, problemeve e kohëzgjatjes, këto njësi ngrihen me akte të Asamblesë apo të Kryesise për njësitë me afat deri në 2 vjet, dhe me vendim të Këshillit të Ministrave për njësitë e tjera.
4. Objekti i tyre, financimi, shtrirja, veprimtaria dhe përbërja përcaktohen në aktet përkatëse që dalin për ngritjen e tyre.

Neni 20

Akademia e të Rinjve

1. Me qëllim inkurajimin drejtpërsëdrejti të veprimtarisë kërkimore-shkencore të kërkuesve të rinj dhe për vendosjen e një ure komunikimi dhe promovimi me ta, funksionon Akademia e të Rinjve, si organ këshillues e bashkëpunues pranë Akademisë. Akademia e të rinjve ka deri në 20 anëtarë, të zgjedhur nga radhët e kërkuesve të rinj me gradën shkencore "doktor". Mandati si anëtar është 4–7 vjet dhe ndërpritet në moshën 40 vjeç.
2. Në përbërjen e saj synohet përfaqësimi nga të gjitha fushat kryesore të dijes, kulturës e shkencës.
3. Anëtarët e Akademisë së të Rinjve përfshihen në komisionet e Akademisë, marrin pjesë në mbledhjet e seksioneve, si dhe një përfaqësi e tyre prej 3-4 nga radhët e tyre, marrin pjesë në mbledhjen vjetore të Asamblesë, ku miratohet raporti, plani vjetor e projektbuxheti i Akademisë së Shkencave.
4. Akademia e të Rinjve funksionon si një organizëm autonom në bazë të një statuti të miratuar prej saj dhe me vendim të Kryesisë.

KREU VI DISPOZITA TË FUNDIT

Neni 21

Marrëdhëniet me institucionet shtetërore

1. Akademia brenda tremujorit të parë të çdo viti, dërgon pranë Këshillit të Ministrave dhe Komisionit Parlamentar përkatës, raportin e veprimtarisë vjetore të punës së saj, për vitin paraardhës.
2. Në mbledhjen e saj vjetore për miratimin e programit të punës së Akademisë, ftohen të marrin pjesë, përfaqësues të institucioneve kryesore të kërkimit dhe të Këshillit të Ministrave.
3. Një herë në vit organizohet dialogu shkencë-politikë ndërmjet Akademisë së Shkencave dhe Këshillit të Ministrave, sipas një marrëveshjeje dypalëshe.

Neni 22

Administrata

1. Kryesia e Akademisë, në ushtrimin e veprimtarisë së saj dhe për kryerjen e shërbimeve administrative, profesionale e teknike, mbështetet nga administrata e Akademisë.
2. Kancelari është autoriteti më i lartë administrativ i Akademisë së Shkencave.
3. Zgjedhja e kancelarit rregullohet sipas legjislacionit në fuqi për shërbimin civil, duke e njësuar këtë pozicion me atë të Sekretarit të Përgjithshëm.
4. Kancelari kryen këto funksione:
 - a) Harton projektbuxhetin vjetor mbi bazën e propozimeve të seksioneve dhe mbështetur në strategjinë e zhvillimit të institucionit;
 - b) Drejton procedurat e prokurimit të buxhetit dhe është urdhërues i tij;
 - c) Ndjek dhe kontrollon zbatimin e buxhetit vjetor të institucionit;
 - d) I paraqet Asamblesë raportin vjetor mbi veprimtarinë financiare të institucionit;
 - e) Detyra të tjera të kancelarit përcaktohen në statut dhe në rregulloret e institucionit.
5. Rekrutimi i punonjësve të administratës rregullohet sipas dispozitave të Kodit të Punës në Republikën e Shqipërisë.
6. Struktura, organika dhe niveli i pagave për administratën përcaktohen nga Asambleja me propozim të Kryesise, e cila ia propozon Kuvendit për miratim.

Neni 23

Financimi

1. Akademia është institucion buxhetor.
2. Veprimtaria e saj financohet nga:
 - a) buxheti i shtetit;
 - b) shërbimet tekniko-shkencore që kryen për persona juridikë e fizikë jashtë sistemit të saj;

c) aplikimet, projektet, dhuratat, subvencionet e sponsorizimet, të cilat përdoren në përputhje me legjislacionin në fuqi.

3. Të ardhurat nga pikat “b” dhe “c” të këtij neni nuk zvogëlojnë buxhetin e përgjithshëm sipas pikës “a” dhe ato përdoren sipas rregullores së brendshme të Akademisë.

4. Projektbuxheti i Akademisë i dërgohet për miratim Kuvendit.

Neni 24 **Statuti i Akademisë**

Rregullat, procedurat dhe kriteret e detajuara për organizimin dhe funksionimin e Akademisë përcaktohen në Statutin e Akademisë.

Neni 25 **Dispozita kalimtare**

1. Ngarkohet Akademia e Shkencave që brenda 6 muajve nga hyrja në fuqi e këtij ligji, të miratojë ndryshimet në statutin e saj në përputhje me këtë ligj.
2. Deri në miratimin e këtyre ndryshimeve do të zbatohet statuti që është në fuqi, për aq sa dispozitat e tij nuk bien në kundërshtim me këtë ligj.
3. Mandatet e anëtarëve të Akademisë së të Rinjve të ngritur me vendimin e Kryesisë nr. 14, datë 7 qershor 2017, janë të vlefshme deri në përfundimin e afatit të tyre.
4. Anëtarësimet e reja në Akademinë e të Rinjve do të bëhen pas miratimit të Statutit të ri sipas këtij ligji.

Neni 26 **Shfuqizime**

1. Me hyrjen në fuqi të këtij ligji, ligji nr 9655 datë 11.12.2006 “Për Akademinë e shkencave në Republikën e Shqipërisë” i ndryshuar shfuqizohet, me përjashtim të nenit 7 të këtij ligji “shpërblimi i anëtarëve”.
2. Ngarkohet Akademia e Shkencave që brenda tre muajve nga hyrja në fuqi e këtij ligji, t’i propozojë Kuvendit për miratim strukturën, organikën dhe nivelin e pagave për administratën e saj.

Neni 27 **Hyrja në fuqi**

Ky ligj hyn në fuqi 15 dite pas botimit në Fletoren Zyrtare.

KRYETARI
Gramoz Ruçi